



Qaanaami Utoqqaat Illuat
B-400
Postboks 63
3971 Qaanaaq

19. marts 2019

Nat. nr./j.nr.: 2017-900-0018

All. nr./brevnr.: 60085

Sull./sagsbeh.: LARI/jh

**INAARUTAASUMIK NALUNAARUSIAQ
Qaanaami Utoqqaat Illuanni misissuineq**

1. Aallaqqaasiut

Misissuiartortut Inatsisartut Ombudsmandianneersut 26. april 2018-imi Qaanaami Utoqqaat Illuanni siumut nalunaaruteqaqqaarlutik misissuineramik ingerlatsipput. Misissuineq naammagittaalliummik aalajangersimasumik tunngaveqarnani Ombudsmandip nalinginnaasumik ingerlatsineranut atatilugu ingerlanneqarpoq.

Misissuiartortut tassaapput siunnersortit pisortaat Lasse Risager, immikkut siunnersorti Franz Amdi Hansen aamma oqalutsi/nutserisoq Jokum Nielsen, tamarmik Ombudsmandeqarfimmi atorfeqartitaasut.

Qulequttat misissuinermi oqaloqatigiissutigineqartut ilaannaat nalunaarusiamimi matumani ilanngunneqarput.

Utoqqaat Illuat aamma Avannaata Kommunia nalunaarusiamut matumunnga missingiut pillugu oqaaseqaateqarnissaminut periarfissinneqarput. Oqaaseqaatit arlallit Utoqqaat Illuat suleqatigalugu suliarineqarsimasut Avannaata Kommuniata uannut e-mailikkut 2. januar 2019-imeersukkut nassiupai. Oqaaseqaatit taakku nalunaarusiamut matumunnga ilanngussami is-suarneqarput.

2. Misissuinermi inatsisitigut tunngavigisat

Ombudsmandip misissuinerini inatsisitigut tunngavigisat Inatsisartut Ombudsmandiat pillugu Inatsisartut inatsisaatigut nr. 7-ikkut, 1. juni 2017-i-

meersukkut (matuma kingorna Ombudsmandi pillugu inatsimmik taaneqartartussakut) aalajangersarneqarput.

Ombudsmandi Inatsisartunit qinerneqartarpoq, tak. Ombudsmandi pillugu inatsimmi § 1, imm. 1, suliaminilli ingerlatsinermini Inatsisartunut attuumassuteqartuunani, tak. § 6, imm. 1.

Ilaatigut Namminersorlutik Oqartussat kommunillu ataanni pisortat ingerlatsiviisa ilaat tamarmik Ombudsmandip sulinerani pineqartunut ilaatinneqarput, tak. Ombudsmandi pillugu inatsimmi § 7, imm. 1, oqaaseqatigiit siulliit.

Ombudsmandip suliassaa tassaavoq oqartussaasut inuilluunniit Ombudsmandip sulinerani pineqartunut ilaatinneqartut inatsisinik atuuttunik unioqutitsisumik iliuseqarnerisut imaluunniit suliassaminnik ingerlatsinerminni allatut iliorlutik kukkussuteqarnermut sumiginnaanermulluunniit pisuussuteqarnerisut nakkutigissallugu, tak. Ombudsmandi pillugu inatsimmi § 19, imm. 1. Ombudsmandi isornartorsiuisinnaavoq, inassuteqaateqarsinnaalluni suliarlugu pillugu paasinninnerminik saqqummiussisinnaalluni, tak Ombudsmandi pillugu inatsimmi § 20. Ombudsmandip suliamik misissuinerata takuttippagu pisortat ingerlatsivianni annertunerusumik kukkussuteqartoqarsimanissaa imaluunniit sumiginnaasoqarsimanissaa ilimagisariaqartoq, Ombudsmandi suliaq pillugu Inatsisartut Inatsisinut Ataatsimiititaliaannut tamatumunngalu peqatigitillugu Naalakkersuisunut imaluunniit kommunalbestyrelsimut nalunaaruteqassaaq, tak. Ombudsmandi pillugu inatsimmi § 23.

Ombudsmandi pillugu inatsimmi § 16-imi oqaaseqatigiinni siullerni aalajangersarneqarpoq paaqqinniffiit suliffeqarfiilluunniit Ombudsmandip sulinerani pineqartunut ilaatinneqartut Ombudsmandip misissorsinnaagai. Taamatut misissuineranut atatillugu – Ombudsmandi pillugu inatsimmi §§-ini 19-imi 20-milu aalajangersarneqartut saniatigut – Ombudsmandip pissutsit paaqqinniffiup aaqquussuusaaneranut ingerlanneqarneranullu tunngasut kiisalu pissutsit paaqqinniffimmik atuisut pineqartarnerannut taakkulu pillugit ingerlattanut tunngasut inuppalaartumik misigittartumillu isiginnittaaseq aal-

laavigalugu naliliiffigisassavai, tak. Ombudsmandi pillugu inatsimmi § 16-imi oqaaseqatigiit aappaat.

3. Misissuinerup piareersarneqarnera ingerlanneqarneralu

Utoqqaat Illuat misissuinissaq pillugu oqarasuaatikkut 4. august 2017-imi kalerrinneqarpoq, misissuinissarlu pillugu allakkatigut 26. februar 2018-i-meersutigut sukumiinerusumik ilisimatinneqarluni.

Paaqqinniffik najugaqartullu pillugit Utoqqaat Illuannit allakkatigut paasissutissanik assigiinngitsunik misissuinissaq sioqqullugu tigusaqarpunga.

Sulisut, najugaqartut ilaqutaasullu misissuinissaq pillugu allakkatigut siumut ilisimatinneqarput, ilanngullugulu ilisimatinneqarlutik misissuiartortunik oqaloqateqarnissamut periarfissaqartut.

Misissuinermi Utoqqaat Illuanni aqutsisut, tassaasut aqutsisuugallartoq tassungalu tullersortaagallartoq, misissuiartortut oqaloqatigaat. Misissuiartortut tamatuma saniatigut sulisut tallimat najugaqartullu tallimat ataasiakkaarlugit oqaloqatigaat.

Misissuiartortut taamatuttaaq Utoqqaat Illuata initai misissuataarpaat.

4. Utoqqaat Illuat pillugu ataatsimut oqaatigisassat

Utoqqaat Illuat Avannaata Kommuniata ataani kommunip utoqqarnik paaqqinniffiutigaa.

Misissuinerup nalaani Utoqqaat Illuanni aalajangersimasumik najugaqartut 20-upput oqilisaassillunilu inissat marluullutik.

5. Ombudsmandip pingaarnerusutigut naliliinera

Pingaarnertut isumaqarpunga Utoqqaat Illuat najugaqartunut toqqissisimantunik avatangiiseqartitsisoq. Taamatuttaaq isumaqarpunga Utoqqaat Illuanni aqutsisut sulisullu suliassaminnik tunniusimallutik ilumoorlutillu isumaginittut.

Najugaqartut tallimat misissuiartortunit oqaloqatigineqartut ersersippaat Utoqqaat Illuanni najugaqarnertik nuannaralugu.

Misissuiartortulli aamma ilisimatinneqarput Utoqqaat Illuata 2018-imi martsisioqqullugu isumaginninnermik suliaasaqarfimmi pissaanermik atuineq pillugu malittarisassat atuuttut eqqumaffigisimanngikkai.

Isumaqarpunga taamaaliornikkut najugaqartut inatsisitigut illersugaanerataalajangiisuusumik sanngiillisinneqarsimasoq. Tamanna akuerineqarsinnaanngitsutut isorisarialerujussuartullu isigaara. Tamanna tulliuttuni imm. 6-imi sukumiinerusumik allaaserineqarpoq.

Pissutsit allat arlallit oqaaseqaateqarnissannut aamma pissutissaqalersippaanga. Taakku tulliuttuni imm. 7-imit 10-mut allaaserineqarput.

6. 2018-imi martsisioqqullugu pissaanermik atuineq pillugu inatsimmik ilisimasaqannginneq

6.1. 26. februar 2018-imi allakkanni Utoqqaat Illuat qinnuigaara ilaatigut najugaqartunut pissaanermik atuinnermut paaqqinniffiup najoqqutai 2017-imilu pissaanermik atuisimanermut paaqqinniffiup nalunaarutai uannut nassiateqqullugit.

E-mailikkut 21. marts 2018-imeersukkut Utoqqaat Illuat ilaatigut akivoq sulisut najugaqartunut pissaanermik atuineq ajortut. E-mailimi atuarneqarsinnaavortaaq Utoqqaat Illuanni aqutsisut sulisullu pissaanermik atuisimanermik nalunaarutiginninnissamut immersuivissaqartoq aatsaat ilisimalersimagaat 2018-imi martsip ulluisa 7-iannit 14-iannut Ilulissani isumasioqatigiinnermi Utoqqaat Illuata aqutsisuugallartoq peqataammat. Tamatuma malitsigisaanik nalunaaruteqarluni immersugassat Utoqqaat Illuata 20. marts 2018-imiit atulersimavai.

26. april 2018-imi misissuinnermi Utoqqaat Illuata aqutsisorigallagaata itisiilluni nassuiaatigaa Utoqqaat Illuanni aqutsisut sulisullu inatsisiliortoqarsi-

manera 2018-imi marsi sioqqullugu ilisimasaqarfigisimanngikkaat. Aqutsisuugallartup – qaammatit qulingiluat eqqaassanngikkaanni 2013-imiit Utoqqaat Illuanni aqutsisuugallartutut atorfeqarsimasup – aamma ilisimatitsissutigaa piffissami tamanna sioqqullugu aamma pisoqartarsimasoq pissaanermik atuneq pillugu inatsimmi malittarisassat malillugit nalunaarutigineqartussaasimagaluartunik, kisiannili nalunaarutigineqarsimanngitsunik.

Utoqqaat Illuata aqutsisorigallagaata taamatuttaaq ilisimatitsissutigaa 20. marts 2018-ip kingorna pissaanermik atuisoqarsimasoq, tamatumalu malitsigisaanik pissaanermik atuneq pillugu inatsimmi piumasarineqartutut nalunaaruteqarluni immersugassanik immersuisoqarsimalluni. Pisuni taakkunani tamani najugaqartoq aalajangerlugu tigummineqarsimavoq nangia taarserneqarsinnaaniassammat.

Najugaqartut misissuiartortut oqaloqatigisaasa tallimat tamarmik ilisimatitsissutigaa Utoqqaat Illuanni sulisunit timikkut pissaanermik atuinermik misigisaqarsimanngisaannarlutik.

6.2. Paasisinnaavara utoqqaat illuanni pisoqarsinnaasarmat najugaqartoq pisariaqartumik paaqqutariniarlugu isumassorniarlugulu pinngitsaaliineq pisariaqalersinnaalluni, assersuutigalugu najugaqartoq puiguttorsimasoq anartarfiliarsinnaanngitsorlu nangilerneqarumanngippat. Kisianni soorunami aalajangiisuuvoq utoqqaat illuanni sulisut najugaqartunut taamaallaat inatsisikkut akuerisaasunik pissaanermik atuippata, pissaanermillu atuneq tamanna pippat najugaqartut inatsisikkut illersugaanerat naapertuuttumik isiginiarlugu.

Utoqqaat illuini najugalinnut sulisut pissaanermik atuisinnaanerat pissaanermik atuneq pillugu inatsimmi (isumaginninnermik suliassaqarfimmi pissaanermik atuneq pillugu Inatsisartut inatsisaanni nr. 1-imi, 21. november 2013-imeersumi kingusinnerusukkut allannguutitalimmi)¹ malittarisassaqar-

¹ Tamatuma saniatigut naatsorsuutigineqartariaqarpoq pisut immikkut ittut ilaanni qaqutiguinnaq pissaanermik atuisoqarsinnaammat allatut ajornartumik illersuisariaqalerneq aamma illersuisinnaatitaaneq pillugit tunngaviit najoqqutaralugit.

tinneqarpoq. Inatsimmi tassani najoqqutassatut tunngaviit pingaarnerit ilaat eqqartullatsiassavakka. Inatsisip sukumiinerusumik allaaserineqarnera eqqarsaatigalugu "Isumaginninnermik suliaasaqarfimmi pissaanermik atuneq pillugu Inatsisartut inatsisaannut ilitsersuut – immikkoortoq III inersimasut pillugit" 2013-imi novemberimi taamanikkut Isumaginninnermut Inatsisunik Atuutsitsinermullu Naalackersuisoqarfiusumit saqqummersinneqartoq, Naalackersuisullu nittartagaanni www.naalackersuisut.gl-imi aaneqarsinnaasoq, innersuussutigissavara.

Oqaatigaara utoqqaat illuanni najugaqartut tamarmik pissaanermik atuneq pillugu inatsimmut ilaatinneqanngimmata. Taamaalilluni pissaanermik atuneq pillugu inatsisip ilaa inunnut 18-ileereersimasunut tunngasoq, taamaallaat periarfissiivoq, inuit ilaannaannut, tarnikkut pissutsimikkut annertuumik ataavartumillu piginnaanikillimasunut pissaanermik atuisinnaanissamut, sukumiinerusumik pissaanermik atuneq pillugu inatsimmi § 3 takuuk. Pisut apeqqutaatillugit tamatumani ilaatigut pineqarsinnaapput utoqqaat illuanni najugaqartut puigortunngorsimasut.

Pissaanermilli atuneq pillugu inatsit aalajangersakkanik arlalinnik imaqarpoq inuit, inatsit malillugu iliuuseqarfigineqarsinnaasut ataqqinnittumik inatsisitigullu illersugaaneq eqqarsaatigalugu illersorneqarsinnaasumik pineqar-nissaannik qulakkeerinneqataasunik.

Siullermik pissaanermik atuneq pillugu inatsimmi aalajangersarneqarpoq inuk pineqartoq nammineq piumassutsimik peqataatinniarlugu kommuni sumiiffigisaq periarfissanik tamanik atueqqaarsimassasoq, tak. pissaanermik atuneq pillugu inatsimmi § 30, imm. 1. Taamatuttaaq pissaanermik atuneq anguniakkamut naleqqiullugu imminnut naapertuuttumik atsikkutigiissapput, tak. § 30, imm. 2, pissaanermillu atuneq sapinngisamik mianersortumik sapinngisamillu sivikinnerpaamik aamma pineqartumut allanullu najuuttunut sapinngisamik mianerinnilluni pissalluni, taamaalilluni pisariaqanngitsumik kanngunarsaasoqassanngimmat akornusiisoqaraniluunniit, tak. § 30, imm. 3.

Aappaattut pissaanermik atuineq pillugu inatsit taamaallaat periarfissiivoq pinngitsaaliinerit inatsimmi erseqqissumik taaneqartut atorineqarnissaannut. Akuliunnerit tamakku qaqugu qanorlu pissanersut pissaanermik atuineq pillugu inatsimmi allaaserineqarput. Assersuutigalugu nangimik taarsiisoqassatillugu aalajangersimasumik tigummininnermut ikiuutitut atortunik atuisoqassanngilaq, soorlu aamma inuk aalajangerlugu tigummininneq aatlaat pisinnaasoq pineqartup isumassorneqarnissaata isumaginissaanut tamanna pisariaqarluinnartutut isigineqarpat. Tamanna pissaanermik atuineq pillugu inatsimmi § 33-mi, pisuni eqqiluisaarnermut tunngasuni pissaanermik atuineq pillugu sukumiinerusunik malittarisassaqaqartitsiviusumi, atuarneqarsinnaavoq:

”§ 33. Kommunimi sumiiffigisami kommunalbestyrelsi qaqutigut aalajangiinnaavoq najugaqarfittut ulluuneraniluunniit neqeroorummi pisortaq, imaluunniit sulisoq, pisortamit taamatut iliornissamut piginnaatinneqartoq inummik aalajangersimasumik tigumminilluni pissaanermik atuisinnaasoq, inuttut eqqiluisaarnermut atatillugu pineqartup isumassorneqarnissaata isumaginissaanut tamanna pisariaqarluinnartutut isigineqarpat. Inuttut eqqiluisaarnermut atatillugu pissaanermik atuinerup siunissami pinngitsoornissaa peqatigisaanik qulakkeerniarneqassaaq.

Imm. 2. Imm. 1 naapertorlugu timikkut pissaanermik atuineq eqqiluisaarnermik pisuni tulluuttuni akuerineqarsinnaassaaq:

- 1) Kigutininik saliineq.
- 2) Unngiarneq.
- 3) Qulinneq, uffarneq atisanillu taarsiineq.
- 4) Nujajartinneq kukiartinnerlu.
- 5) Nangernik nalequttanillu taarsiineq.
- 6) Amerissaaneq.
- 7) Ulussat iluini qarngullu iluani nerisat sinnikuinik peersineq.

Imm. 3. Kommunilbestyrelsip aalajangiinerani eqqiluisaarnermi pissutsit piviusut suut aalajangiineri pineqarnersut erseqqissaatigineqassaaq.

Imm. 4. Aalajangersimasumik tigummininnermut ikiuutitut atortunik atuisoqassanngilaq, aamma aalajangersimasumik tigumminneriaaseq taamatullu iliornikkut anguniagaasoq imminnut naleqqiullutik atsikkutigiissallutik.

Imm. 5. Aalajangersagaq manna naapertorlugu timikkut pissaanermik atuineq piffissami qaammatit pingasut tikillugit sivisussusilimmi akuerineqarsinnaavoq. Kommunilbestyrelsi piffissamik sivitsuisinnaavoq, qaammatinilli arfinilinnik sivisunerunngitsumik, pineqartumi eqqiluisaarnikkut pissutsit pitsaanerulersinniarlugit periutsit allat peqatigisaanik ineriartortinneqassammata, tak. imm. 1, oqaaseqatigiit aappaat.

Imm. 6. Inuup imm. 1 naapertorlugu siusinnerusukkut aalajangiiffigineqareersup tarnikut pissutsimigut annertuumik ataavartumillu piginnaasakillismanera sulijorseriaateqaaqqippat, pisuni eqqiluisaarnermut tunngasuni aalajangersimasumik tigumminilluni timikkut pissaanermik atuinissamut akuersissut piffissamut qaammatit pingasut tikillugit atuuttussaq pillugu aalajangiisoqaaqqissinnaavoq, piffissaq qaammatit 6 tikillugit sivitsorneqarsinnaalluni."

Pissaanermik atuineq pillugu inatsit pingajuattut sulianik suliarinnittarneq pillugu piumasaqaatinik assigiinngitsunik imaqarpoq, suliassat suliarineqartarnerat pillugu inatsit (pisortat ingerlatsineranni suliassat suliarineqartarnerat pillugu Inatsisartut inatsisaat nr. 8, 13. juni 1994-imeersoq kingusinnerusukkut allannguutitalik) malillugu piumasaqaatinut tapertaasunik.

Assersuutigalugu eqqiluisaarnermut atatillugu aalajangerlugu tigumminninneg kommunimi sumiiffigisami kommunalbestyrelsip aalajangiineratigut pisartussaavoq, pissaanermik atuineq pillugu inatsimmi § 33 siuliani issuarneqartoq naapertorlugu. Kommunalbestyrelsip aalajangiineranut tunngavisatut ilaatigut iliuusissat eqqarsaatigineqartut pillugit ilaqquttat taamaattoqarpallu nakkutilliusup oqaaseqaataat pigineqassaaq, pissaanermik atuineq pillugu inatsimmi § 41, nr. 4 naapertorlugu.

Kommunalbestyrelsip aalajangiinera tamatuma kingornatigut Isumaginninnermi Naammagittaalliuteqartarfimmut naammagittaalliutigineqarsinnaavoq. Tamanna pissaanermik atuineq pillugu inatsimmi § 48, imm. 1-ikkut aalajangersarneqarpoq.

Tamatuma saniatigut oqaatigineqareersutut pissaanermik atuinert suugaluartulluunniit kommunimi najugarisami kommunalbestyrelsimut Naalakkersuisunullu nalunaarutigineqartartussaapput. Nalunaaruteqartarnermut mallittarisassat ilaatigut pissaanermik atuineq pillugu inatsimmi § 53-imi takuneqarsinnaapput.

6.3. Misissuinnermi oqaloqateqarnerit aallaavigalugit misissuiartortut pingaarnertut misigisimapput Utoqqaat Illuata aqutsisui sulisullu tamarmiullutik sapinngisamik najugaqartunut pissaanermik atuinnginnissaq eqqumaffi-

gisorujussuugaat. Isumaqarpungali eqqumaffiginninneq tamanna suliassa-qarfimmi malittarisassanik naammaginartumik ilisimasaqarnermik tunnga-veqanngitsoq.

Suliamik misissuina tunngavigalugu erseqqinnerusumik isummerfigisinaanngilara pisuni aalajangersimasuni suni Utoqqaat Illuanni pissaanermik atuneq pillugu inatsimmi malittarisassanut akerliusumik iliuuseqartoqartarsimasinnaanersoq. Tamatumunnga ilaatigut pissutaavoq Utoqqaat Illuata paasissutissiissutigineqartut malillugit najugaqartunut pissaanermik atuneq aatsaat 20. marts 2018-imit nalunaarsortalermagu.

Oqaatigaara utoqqaat illuanni pissaanermik atuinermik pingaarnerusutigut nakkutilliinermut – kommunimit, Naalakkersuisunit Ombudsmandeqarfimmiillu – eqqortumik nalunaarutiginnittoqartarnissaa aalajangiisuummat. Taamaalilluni pissaanermik atuinermik nalunaaruteqartarneq Utoqqaat Illuani najugaqartut inatsisitigut illersugaanerannik qulakkeerinneqataavoq.

Paasissutissat misissuiartortunit pissarsiarineqartut tunngavigalugit taamaattoq inerniliuttariaqarpara Utoqqaat Illuata piffissami sivisuumi pissaanermik atuneq pillugu inatsimmi malittarisassat eqqumaffigisimanngikkai, ilaatigullu Utoqqaat Illuanni najugaqartunut malittarisassat taakku unioqqutinneqartarsimallutik.

Ataatsimut isiginnillunga isumaqarpunga pissutsit taamaanneratigut najugaqartut inatsiseqartitsinikkut innarlitsaalineqarnerat aalajangiisuusumik sanniillisinneqarsimasoq. Tamanna akuerineqarsinnaanngitsutut isorisarialerujussuartullu isigaara.

Isumaqarpungattaaq taamaaliornikkut annertuumik kukkussuteqartoqarlunilu sumiginnaasoqarsimasoq. Taamaattumik Ombudsmandi pillugu inatsimmi § 23 malillugu Avannaata Kommuniani kommunalbestyrelsi, kommunimi utoqqarnik paaqqinniffinnut qullerpaatut akisussaasuusoq, Inatsisartunilu Inatsisinut Ataatsimiititaliaq tamatuminnga nalunaarfigaakka. Tamatuma saniatigut Isumaginninnermut Inatsisinik Atuutsitsinermullu Naalakkersuiso-

*qarfik, pissaanermik atuineq pillugu inatsimmik suliassaqarfimmut oqartus-
saasuusooq, suliaq pillugu nalunaaruteqarfigaara.*

*Inassuteqaatigaara Utoqqaat Illuata sulisut tamarmik pissaanermik atuisar-
neq pillugu inatsimmi malittarisassanik pisariaqarneratut annertutigisumik i-
lisimasaqarnissaat qulakkeerniarlugu suliniutigissagaa.*

7. Aalajangiinerit pissaanermik atuinnermut tunngavittut

Misissuinermi pissaanermik atuinissaq sapinngisamik pinngitsoorniarnear-
tartoq misissuiartortut sulisumit ilisimatinneqarput, kisiannili ukiuni arlalini-
ngortuni nangit taarserneqarnerinut atatillugu najugaqartoq ataaseq aalaja-
ngerlugu tigummineqartariaqartarsimasooq, taamaaliortoqanngippat najuga-
qartoq sulisunut nukimminik atuniartarmat. Pisut tamakku nalunaarsorne-
qarsimanngillat.

Sulisulli aamma ilaqarput nangit taarserneqarnerinut atatillugu najugaqartut
aalajangerlugit tigummineqartariaqarsimaneridik misigisaqarsimanngitsunik.

Sulisuma ilaata Utoqqaat Illuata aqutsisorigallagaa misissuinerup kingorna-
tigut sianerfigaa, najugaqartullu ataatsip taassuma aalajangerlugu tigummi-
neqartariaqarsimanagera pillugu paasissutissat misissuiartortut pissarsiarisi-
masaat oqaluttuaralugit. Utoqqaat Illuata aqutsisorigallagaata paasissutissat
taakku ilumoornerarpai. Utoqqaalli Illuata aqutsisorigallagaata kommuni ta-
manna pillugu aalajangiisimanagerooq ilisimanngilaa.

Siuliani imm. 6.2-mi oqaatigineqartutut pissaanermik atuineq pillugu inat-
simmi § 33, imm. 1-imi aalajangersarneqarpoq eqqiluisaarnermut atatillu-
gu inummik aalajangerlugu tigumminninneq kommunimi najugarisami kom-
munalbestyrelsip aalajangiineratigut pisassasooq.

Eqqortussarli anguniarlugu oqaatigaara pissaanermik atuineq pillugu inat-
simmi takuneqarsinnaanngimmat kommunalbestyrelsip aalajangiinera allak-
katigut nalunaarutigineqassanersooq. Inatsisilerinermulli tunngatillugu allaa-
tigisani nalinginnaasumik naatsorsuutigineqartarpoq ingerlatsinermi ileqqo-

rissaarnerup ilagigaa ass. pissaanermik atuinissaq pillugu akuliuffiunerusu-
mik aalajangiinerit allakkatigut nalunaarutigineqartarnissaat.

Niels Fengerip allallu atuakkiaanni "Forvaltningsret"-imi (2018-imeersumi),
quppernerit 628 tullialu aamma Karsten Revsbechip allallu atuakkiaanni
"Forvaltningsret – Sagsbehandling"-imi, arfineq aappasaanik naqitertinne-
qartumi (2014-imeersumi), qupperneq 297 ilaatigut innersuussutigaakka.

*Inassuteqaatigaara Utoqqaat Illuat najugaqartunut pissaanermik atuissatil-
lugu, pissaanermik atuneq pillugu inatsit tunngavigalugu pisariaqarneratut
aalajangiisoqareersimanissaa Utoqqaat Illuata qulakkeertassagaa.*

8. Pissaanermik atuinermik nalunaarutiginninneq

8.1. Siuliani imm. 6-imi oqaatigineqartut misissuiartortut misissuinissaq
sioqqullugu Utoqqaat Illuannit ilisimatinneqarput Utoqqaat Illuata pissaaner-
mik atuinerup nalunaarsorneqarnissaanut nalunaaruteqarluni immersugas-
saq aatsaat 20. marts 2018-imi atulersimagaa. Aqutsisuugallartup misissu-
inermi paasissutissiissutigaa immersugassaq tamanna sioqqullugu mar-
loriarluni atornerqarsimasoq, nalunaaruteqarfissalli e-mailikkut nassitsivis-
samut immersugassami taaneqartumut nassiunneri pisuni marlunni tamani
iluatsissimanngitsoq. Misissuiartortut immersugassat immersorneqarsimasut
marluk taakku assilinerinik pissarsipput, taakkulu tulleriinneri malillugit 28.
marts 2018-imi aamma 18. april 2018-imi ullulerneqarsimapput. Immersu-
gassani tamani najugaqartoq taanna pineqarpoq.

Pissaanermik atuinermik nalunaaruteqartarnek pillugu malittarisassat ilaati-
gut pissaanermik atuneq pillugu inatsimmi § 53-imi takuneqarsinnaapput:

"§ 53. § 36 naapertorlugu najugaqarfissatut neqeroorummut tigutinneq pissaanermillu
atuinerit assigiinngitsut tamarmik, ilanngullugit §§ 30-35 naapertorlugit pineqaatinut ata-
tillugu pissaanermik atuinerit, najugaqarfittut neqeroorummit nalunaarsorneqassapput,
kommunimilu sumiiffigisami kommunalbestyrelsimut Naalakkersuisunullu nalunaarutigine-
qassallutik.

Imm. 2. Immikkoortoq III naapertorlugu nalunaarsuineq nalunaaruteqarnerlu pissaq nalunaaruteqarnermut immersugassat immikkut ittut Naalakkersuisunit suliarineqartut atorlugit."

Immersugassat marluk, assilineri misissuiartortut pissarsiarisaat, aalajangersakkamut tassunga innersuussinertaqanngillat, kisiannili meeqqanik inuusuttunillu kiisalu annertuumik innarluutilinnik ulloq unnuarlu paaqqinniffiit pillugit Namminersornerullutik Oqartussat nalunaarutaannut nr. 64-imut, 29. december 1994-imeersumut (ulloq unnuarlu paaqqinniffiit pillugit nalunaarummut) innersuussisoqarluni.

Ulloq unnuarlu paaqqinniffiit pillugit nalunaarut siusinnerusukkut pissaanermik atuineq pillugu kapitalimik imaqarpoq, kapitalili taanna pissaanermik atuineq pillugu inatsimmi § 59, imm. 2, tak. imm. 1, naapertorlugu atuukunnaarsinneqarpoq pissaanermik atuineq pillugu inatsit 1. december 2013-imi atuutilermat. Naalakkersuisut immersugassamik tamatuma kingornatigut suliaqarput pissaanermik atuineq pillugu inatsimmi malittarisassat malillugit nalunaarutiginninnermi atorineqartartussamik. Immersugassat taakku Naalakkersuisut nittartagaanni www.naalakkersuisut.gl-imi aaneqarsinnaapput.

Taamaalilluni Utoqqaat Illuata nalunaarutiginninnermi immersugassaq pisoqalisimasoq atorsimavaa.

Inassuteqaatigaara Utoqqaat Illuata pissaanermik atuisimanermik nalunaaruteqarnermi immersugassat atuuttut atortassagai taakkulu tiguisissanut eqqortunut apuunnissaat qulakkeertassagaa.

8.2. Nalunaaruteqarnermi immersugassat marluk immersorneqarsimasut siuliani imm. 8.1-imi oqaatigineqartut misissuiartortut misissuinerminni Utoqqaat Illuannit pissarsiai misissuataarpakka.

Nalunaaruteqarnermi immersugassaq 28. marts 2018-imeersoq oqaaseqaateqarnissannut immikkut pissutissaqalersitsivoq. Immersugassap immersor-

neqarsimasup ilaatigut imarai najugaqartup aqqa, sulisut peqataasimasut aqqi, pissaanermik atuinerup qanga pisimanagera tamatumalu sivisussusia pillugit paasissutissat, soorlu aamma pissaanermik atuineq pillugu immikkoortumi x-iliivissani "Aalajangerlugu tigummineqarpoq" x-ilerneqarsimasoq. Immersugassamili "Qanoq pisoqarnerata allaaserinera (pissaanermik atuineq sioqqullugu pineratalu nalaani pisut) sapinngisamik naatsumik erseqqissumik pisut pinerattut allanneqassapput" najugaqartup peqqissusia pillugu oqaaseqaatit assigiinngitsut taamaallaat taaneqarsimapput. Immersugassami tassani immersugassaniluunniit allani taamaalilluni qanorpiaq pisoqarsimanersoq sukumiinerusumik nassuiaatigineqarsimanngilaq.

Isumaqarpunga pissaanermik atuineq sioqqullugu kingornatigullu qanorpiaq pisoqarsimanerata sukumiinerumik allaaserineqarnera pingaarutilerujussusoq, pissaanermik atuineq inatsimmik unioqqutitsinani pisimanersoq kingusinnerusukkut nalilerneqarsinnaassappat.

Inassuteqaatigaara nalunaaruteqarnermi immersugassat siunissami peqqisaartumik immersorneqartarnissaat Utoqqaat Illuata qulakkiissagaa.

Ilanngullugu inassuteqaatigaara Utoqqaat Illuata Avannaata Kommuniiani ingerlatsivik suleqatigalugu pingaarnertut Utoqqaat Illuanni aqutsisut sulisullu pissaanermik atuineq pillugu inatsimmi nalunaarutiginnittarnermik malittarisassat pillugit pisariaqartunik ilisimasaqarnissaat qulakkiissagaa, kiisalu tamatumunnga attuumassutilimmik ilinniartitseqqinneq pisariaqarnertatut annertutigisumik isumagissagaa.

9. Matumi silarlarmi akkittaammik atuineq

Misissuinermi Utoqqaat Illuata ilaani paaqqutarineqarnissamik pisariaqartitsinerpaat najugaqarfigisaanni matu silarleq siusinnerusukkut akkittaateqarsimagaluartoq misissuiartortut ilisimatinneqarput. Akkittaat ikkunneqarsimavoq najugaqartoq puigortunngorsimasoq nammineerluni anisannginniasammat. Akkittaat kingusinnerusukkut peerneqarsimavoq, misissuinerullu nalaani matup qulaa'tungaani putut sisamat qinnerit ikkusimaffigisimasaat suli ersillutik.

Utoqqaat Illuanni aqutsisut ilisimatitsissutigaa akkittaat ikkunneqarsimasoq sulisoqatigiinni aalajangerneq malillugu. Aalajangiinermut tamatumunnga kommuni peqataatinneqarsimanngilaq.

Utoqqaat Illuanni matut silarliit ilaanni akkittaateqarneq – misissuiartortunut oqaluttuarineqartut – pissutsit apeqqutaatillugit pissaanermik atuneq pillugu inatsimmi aalajangersarneqartut “matumik ammaassutitut immikkut ittutut” isigineqarsinnaavoq. Pissutsit taamaappata ikkussinermi sule-riaatsit pissaanermik atuneq pillugu inatsimmi aalajangersarneqartut malin-neqartussaapput. Taakkunatigut ilaatigut takuneqarsinnaavoq kommunal-bestyrelsip aalajangigassarigaa matunik ammaassutitik immikkut ittunik a-tuisoqassanersoq.

Matunik ammaassutit immikkut ittut pillugit pissaanermik atuneq pillugu i-natsimmi aalajangersakkat inatsimmi § 31-mi, imm. 4-6-imi, § 41-mi, § 48-mi § 52, imm. 1-amilu takuneqarsinnaapput imatullu oqaasertaqarlutik:

“§ 31. [...]

Imm. 4. Najugaqarfittut ulluuneraniluunniit neqeroorummi pisortap, imaluunniit sulisup, pisortamit taamatut iliornissamut piginnaatinneqartup matunik ammaassutit immikkut it-tut inummut ataatsimut arlaqartunulluunniit atorsinnaagai kommunalbestyrelsi aalajangi-i-sinnaavoq, imaappat

- 1) inuup inuilluunniit arlallit najugaqarfittut ulluuneraniluunniit neqeroorummik qimatsi-nermigut/qimatsinermikkut timikkut annertuumik ajoqusernissamut imminut allanilluun-niit ulorianartorsiortitsilernissaa aarlerinaateqarpat, aamma
- 2) aarlerinaatip tamatuma pinngitsoortinnissaanut pisuni ataasiakkaani pissutsit tamanna pisariaqarluinnartippassuk, aamma
- 3) inatsimmi periarfissat sinneri kinguneqanngitsumik atorneqareersimappata.

Imm. 5. Imm. 4 naapertorlugu matunik ammaassutinut immikkut ittunut ilaapput matup tigummivii marloqiusat, matumik ammaanissamut marloriarluni toorsineq assigisaallu. Ili-uuserisaq imatut matumik parnaarinnissutaassanngilaq, pineqartulli killilersugaanani i-ngerlasinnaaneranut atatillugu kinguarsaataassalluni, taamaasilluni sulisut maluginiarsin-naassammassuk pineqartoq anisoq.

Imm. 6. Imm. 4 naapertorlugu iliuuserisaq aallartinneqarpat, najugaqartut killilersugaa-natik ingerlasinnaanerit mianeriniarlugu matumi kalerrisaarummik ikkussisoqassaaq, taa-maasilluni najugaqartut matumik ammaassummik immikkut ittumik namminneq atuisin-naanngitsut matumik ammaanissamut pisariaqartitaminnik ikiorneqassammata. Najuga-

qartut imm. 4 naapertorlugu iliuserinninnermut ilaasut, aatsaat anitsaaliorneqarsinnaapput § 34-mi aalajangersagaq tamatuma peqatigisaanik atorneqarpat.

[...]

§ 41. §§ 31, 33, 34 aamma 35 naapertorlugit kommunalbestyrelsip aalajangiinerinut tunngavittut tulliuuttut pigineqassapput:

- 1) piginnaanikillineq pillugu suliamut attuumassuteqartumik uppernarsaatit pisariaqartineqartut,
- 2) pineqaatit aallartinnissaat pillugu aalajangiisoqarnissaa siunniunneqartinnagu isumaginnikkut perorsaalluni ikiunneq paaqqutarinninnerlu pillugit paasissutissat,
- 3) piffissaq qanoq sivisutigisoq pineqaatit pisariaqarfissaattut naatsorsuutigineqartoq pillugu paasissutissat, aamma
- 4) pineqaatit eqqarsaatigineqartut pillugit ilaquuttat taamaattoqarpallu nakkutilliusup oqaaseqaataat.

[...]

§ 48. §§ 31, 33, 34, 35, 36, imm. 2, 38, 39, imm. 2 aamma § 42, imm. 3 naapertorlugit kommunalbestyrelsip aalajangiineri Isumaginninnermi Naammagittaalliuteqartarfimmut apuunneqarsinnaapput Isumaginnittoqarfiup aqunneqarnera aaqqissuussaanelu pillugit Inatsisartut peqqussutaat malillugu.

Imm. 2. Inuk aalajangiineri pineqartoq nammineq naammagittaalliuteqarsinnaanngippat, uiusup nuliaasulluunnit, ilaquuttap, nakkutilliusup imaluunniit allap inummut pineqaammiq pineqartumut sinniisup kommunalbestyrelsip aalajangiinera naammagittaalliutigisinnaavaat.

[...]

§ 52. Suliani pineqaatit § 31, imm. 1, § 31, imm. 4 aamma § 34 naapertorlugit aallartineqarfigisaanni, pineqaatip atorneqarnerata ingerlaqqinnissaa kommunimit ataavartumik nalilersoqqinneqartassaaq, pineqaatillu aallartinneqarnissaanik kommunalbestyrelsip aalajangiineraniit kingusinnerpaamik qaammatit arfineq pingasut qaangiutsinnagit nalilersoqqinneqassalluni.

[...]”

Tassani aamma ilaavoq iliuitsit nalunaarsorneqarlutillu kommunimut najugarisamat Naalakkersuisunullu nalunaarutigineqartartussaammata. Taman-

na pissaanermik atuineq pillugu inatsimmi § 53-imi, imm. 1-imi, § 55-imi § 57-imilu sukumiinerusunik malittarisassaqaartinneqarpoq.

Pissaanermik atuineq pillugu inatsit piareersarlugu suliani inatsisissatut siunnersuummi § 31 pillugu immikkut nassuiaatini ilaatigut oqaatigineqarpoq:

”Imm. 5

Parnaarsaativittut atortunik atuisoqaqqusaanngilaq. Aqqusinertigut angallannermi pissut-sit ulorianartut atuussinnaapput, pinngortitami nunaminertat pineqartup tammarfigisin-naasai immikkut ittuusinnaapput, imaluunniit silap pissuserisinnaavai (isserujussuarnera kiarujussuarneraluunniit) atortunik taakkuninnga atuinissamut tunngavissiisinnaasut, allat annikinnerusumik akuliuffiusut iluatsinngitsumik misilinneqareersimappata.

Taamaalilluni iliuutsimik taama annertutigisumik akuliuffiusumik matumik ammaassutitut immikkut ittutut ittumik iliuuseqalertigani, iliuutsinik annikinnerusumik akuliuffiusunik, soorlu inunntu kalerrisaarutininik sumiiffissitutinillu atuinerup misiliisoqareersimanissaata pi-umasaqaatiginera, matumut silarlermut matunik ammaassutinik immikkut ittunik atuinis-samut periarfissanut allannguutaanngilaq. Taamaalilluni najugaqarfittut neqeroorutit il.il. illutamikkut imatut aqqqissugaappata, innuttaasup nammineersinnaanngitsup najugaqar-fimmunit anilerneru sulisunit pisariitsumik takuneqarsinnaasunngorlugu, tamanna siuner-tamut naapertuutissaaq, taamaasilluni iliuusissat piffissaagallartillugu iliuuserineqarsin-naammata.

Imm. 6-imut

Kikkut tamarmik matunik ammaassutinik namminneq atuisinnaanngitsut atuinissamut pi-sariaqartitaminnik ikiorneqassapput, innuttaasooq angerlarsimaffimmunit anitsaaliugaaneq pillugu aalajangersakkamut ilaatinneqartoq pineqanngikkaangat.”

Paasisinnaavara Utoqqaat Illuanni aqutsisut sulisullu kissaatigimmassuk najugaqartut puigortunngortut nakkutigineqaratik aneerlutik ajoqusersinnaa-nerisa pinngitsoortinneqarnissaat.

Naatsorsuutigaaara matumik ammaassutit immikkut ittut pillugit pissaaner-mik atuineq pillugu inatsimmi malittarisassat Utoqqaat Illuata isiginiarumaa-rai, najugaqartut Utoqqaat Illuannik namminneq qimatsisinnaanerat pinngit-soortinniarlugu iliuuseqarnissaaq pisariaqartoq nutaamik nalilerneqarpat.

10. Utoqqaat Illuanni namminermi malittarisassat

10.1. Misissuiartortut misissuinermi Utoqqaat Illuanni namminermi malittarisassat pillugit assigiinngitsunik paasissutissinneqarput, ilaatigut pujortartarneq, piffissat pulaarfusinnaasut imigassartorsinnaanerlu pillugit.

Taamaalilluni misissuiartortut naqitaaqqiamik Utoqqaat Illuanni nalinginnaasumik malittarisassanik imalimmik tunineqarput. Tassani pujortartarnermut malittarisassat pillugit ima allassimasoqarpoq:

“Utoqqaat pisinnaanerusut silamut pujortariartassapput/pitsorluttut iniminni pujortarsinnaapput matortik matullugu kiisalu igalaartik ammarlugu pujortartassapput.

Inatsisini allassimasoqarpoq utoqqaat illuat tamanit pujortartarfiunngitsaq.”

Utoqqaat Illuanni aqutsisuugallartup misissuinermi ilisimatitsissutigaa naqitaaqqiaq pisoqalisimasoq, najugaqartullu tamarmik isersimallutik pujortarsinnaatitaasut.

Eqqortusaaq anguniarlugu oqaatigaara pujortarnermik inerteqquteqarneq pillugu Inatsisartut inatsisaat nr. 15, 26. maj 2010-meersoq ilaatigut paaqqutarinniffittut angerlarsimaffinni il.il. pujortartarneq pillugu aalajangersakamik imaattumik imaqartoq:

“§ 5. Paaqqutarinniffittut angerlarsimaffinni, ulloq unnuarlu paaqqinniffinni, najugaqarfisatut neqeroorutini, ilinniartut ineqarfiini assigisaannilu inunnit 18-it sinnerlugit ukiulinnit arlalinnit najuqarfigineqarnerusuni namminerisamik angerlarsimaffittut atuuttuni najugaqartut ataasiakkaat 18-it sinnerlugit ukiullit ineeqqami inissiamiluunniit angerlarsimaffittut najugaqarfigisaminni pujortarsinnaapput.

Imm. 2. Paaqqinniffik paaqqinniffimmi sulisut najugaqartullu allat pujortanngikkaluarlutik tupap pujuanik najuussuinissaannut illersorniarlugit sunniuteqarluartunik suliniuteqasaaq. Paaqqinniffiup najugaqartut peqqusinnaavai sulisut ineeqqami inissiamiluunniit namminerisatut angerlarsimaffittut atuuttumi isersimatillugit pujortartaqqunagit.”

10.2. Piffissat pulaarfusinnaasut eqqarsaatigalugit Utoqqaat Illuani aqutsisut misissuinermi ilisimatitsissutigaa piffissami ullaakkut qulingiluanit unukkut qulingiluanut Utoqqaat Illuannut pulaartoqarsinnaasoq, malittarisas-

sarli tamanna aqutsisut akuersaagaannik malinneqanngitsoq. Aqutsisut taamatuttaaq ilisimatitsissutigaaq Utoqqaat Illuanni nerinerup nalaani pulaartoqarsinnaannginnera pillugu allagarsiisoqarsimasoq, kisiannili aamma nerinerup nalaani pulaartut aneqquneqarneq ajortut. Misissuiartortut takusinnaasimavaattaq Utoqqaat Illuata isaariaata eqqaani allagarsiivimmi ullup qeqqasiortoqarnerata unnukkorsiortoqarneratalu nalaani pulaartoqarsinnaannginneranik allagarsiisoqarsimasoq.

10.3. Kiisalu Utoqqaat Illuanni malittarisassani misissuiartortunut tunniunneqartumi takuneqarsinnaavoq Utoqqaat Illuanni imigassartorneq inerteqqutaasoq. Misissuiartortulli Utoqqaat Illuata initaasa alakkarthernerini paasiivaat allagarsiivimmi allagarsiisoqarsimasoq, ilaatigut ima imalimmik:

“Utoqqaat Illuanni najugaqartut putoqqaniutigalugu imigassamik atueqqusaanngillat, atuisagunillu ineqartunut sulisunullu akornutaanngitsumik atuisinnaasariaqarlutik.”

Najugaqartut misissuiartortunit oqaloqatigineqartut malittarisassanik paasinninnerat aamma assigiinngisitaarpoq. Taamaalillutik najugaqartut marluk ilisimatitsissutigaaq Utoqqaat Illuata malittarisassai ima paasigitik imigassartornissaq inerteqqutaalluinnartoq. Najugaqartulli allap tamatuma paarlatuanik oqaatigaa marlunnik immiaarartortoqarsinnaasoq.

Sulisuma ilaat Utoqqaat Illuata aqutsisorigallagaanut misissuinerup kingornatigut sianerpoq, taassumalu ilisimatitsissutigalugu Utoqqaat Illuani ataatsimoortarfinni imigassartorneq inerteqqutaasoq, najugaqartulli namminneq inigisaminni imigassartorsinnaasut.

Utoqqaat Illuata aqutsisorigallagaata ilanngullugu ilisimatitsissutigaa Avannaata Kommunia kommunimi utoqqaat illuinut tamanut atuuttussanik assigiisaartunik malittarisassaliorlutik aallartissimasut.

Pujortartarneq, piffissat pulaarfiusinnaasut imigassartorsinnaanerlu pillugit Utoqqaat Illuanni namminermi malittarisassat imarisaat Utoqqaat Illuata a-

qutsisorigallagaanit oqaasiinnartigut saqqummiunneqartut oqaaseqaateqar-nissannut pissutissaqalersitsinngillat.

Utoqqaalli Illuanni namminerimi malittarisassat naqitaaqqiani allagarsiussa-nilu il.il. najugaqartut atuarsinnaasaanni assigiinngissiternerat pissusissami-suunngitsutut isigaara. Taamatuttaaq Utoqqaat Illuanni namminerimi malit-tarisassani aalajangersakkanik malittarisassanit piiginnarnagit aqutsisunit atuutsinneqanngitsunik peqarnera pissusissamisunngitsutut isigaara.

Avannaata Kommuniata kommunimi utoqqaat illuinut tamanut atuuttussa-nik nutaanik malittarisassiornera paasissutissiissutigineqartoq malugaara. Naatsorsuutigaara Utoqqaat Illuata naqitaaqqiat, allagarsiussat il.il. Utoq-qaat Illuanni malittarisassanik eqqunngitsumik ersersitsisut tamatuma ki-ngornatigut nutarterlugilluunniit piarumaarai.

11. Malitseqartitsineq

Utoqqaat Illuat qinnuigaara nalunaarusiaq manna sulisunut, najugaqartunut ilaqutaasunullu ilisimatitsissutigeqqullugu.

Utoqqaat Illuat aammattaaq qinnuigaara nalunaarusiap immikkoortuini 6-imi, 7-imi 8-milu oqaatigisakka qanoq iliuseqarnissamut pissutissaqaler-sitsinersut uannut paasissutissiissutigeqqullugu. Utoqqaat Illuat qinnuigaara paasissutissat taakku Avannaata Kommuniani ingerlatsivik aqqutigalugu nassiuteqqullugit, taamaalilluni ingerlatsivik Utoqqaat Illuata oqaatigisai pil-lugit oqaaseqaateqarnissaminut periarfissaqarsinnaaqqullugu.

Imm. 6-imi oqaatigineqartutut suliami annertunerusutigut kukkussuteqarto-qarsimallunilu sumiginnaasoqarsimasoq isumaqarama Inatsisartut Inatsisi-nut Ataatsimiititaliaat aamma Avannaata Kommuniani kommunalbestyrelsi Ombudsmandi pillugu inatsimmi § 23 tunngavigalugu tamatumingga nalu-naarfigaakka.

Isumaginninnermut Inatsisinillu Atuutsitsinnermut Naalakkersuisoqarfik su-liaq pillugu ilisimatinniarlugu aammattaaq aalajangerpunga.

Nalunaarusiaq manna 2019-imi ukiumoortunik nalunaarutinni ilanngunneqarumaarpoq, nittartakkakkullu www.ombudsmandi.gl-ikkut tamanut saqqumiunneqarumaarluni.

Inuulluaqqusillunga

Vera Leth
Vera Leth

ILANNGUSSAQ

Avannaata Kommuniata nalunaarusiaagallartoq pillugu oqaaseqaatit imaatut uannut e-mailikkut 2. januar 2019-imeersukkut nassiuppai:

"Ombudsmandeqarfiup Qaanaami Utoqqaat illuannut nalunaarusiaanut tunngasoq

Qaanaami Utoqqaat illuanni fg. afdelingslederusoq [...] peqatigalugu Ombudsmandip nalunaarusiaanut tunngasumik akissuteqarneq.

Siullermik Ombudsmandip uparuartorpa Utoqqaat Illuanni pissaanermik atuisinnaanerup tungaatigut akuerineqarsinnaanngitsutut isorisarialerujussuuartullu uparuartugaanut tunngatillugu imatut akissuteqarusuppugut:

6.

Pissaaneq pillugu atuneq

Fg. afdelingslederusup paasisimavaa soorunami taamatut atuissagaanni immersugassaqartoq taamatullu atuinermi marloriarlutik immersugassaq atorlugu immersuisimapput, kisiannili nalusimavaat nutaaqartoq immersuiffissamik, taannalu pillugu Avannaata Kommuniata utoqqaat illuinut ataqatigiissaarisooq aqutigalugu ujartuisimapput nutaamik immersuiffissamik pissarsiniarnermini, kisiannili ataqatigiissaarisup nassaarisinnaasimangilaa pissaanermik atuissagaanni atueerermilu immersuiffissaq nutaaq, taamaasillutik maannamut nutaamik pissaanermik atuissagaanni atueerermilu soqarnatik nalunaarutigalugu, taamaallaallu nutaajunngitsoq maannamut pigilersimallugu, taannalu inatsit pillugu annertunerusumik pikkorissaassutigineqartariaqaraluarneranik fg. afdelingsleder Utoqqaat Illuanni inissisimasuusoq isumaqarluni, soorlu Ombudsmandip isumaqarfigigaa taassuminnga inatsimmik atuisussaasut (tassa) sulisut annertuumik ilisimasaqarfigingikkaat taamatullu aamma oqariartuutigineqarluni "akuersaarneqarsinnaanngitsutut isorisarialerujussuuartullu".

Isumaqatigiissutigivarpullu pissaanermik atuissagaanni sukumiinerusumik inatsit pineqartoq pillugu misissuinissarput.

9.

Matumi silarlarmi akkittaammik atuneq

Siullermik akkittaatit atorneqarsimagaluarpud taakkulu isumannaannerpaaq atorniarlugu peerneqarsimappud matullu isorlerpaat qimaaffissiatut atorneqartussatut maannakkut isigineqarlutik.

Puigortungortoq ataaseq matukkut taakkunatigut anisimavoq kamillaanngarlu qimmit tikilerai angumerineqarluni Utoqqaat Illuannut utertinneqarsimavoq, taamaattoqariarmat akkittaatit atorunnaarsimavai.

Puigortunngortut taamatullu aamma najugaqartut taakku matut qanoq atorneqartussaaneriniq ilitsersorneqartarput maannakkumut allaat, matut taakku najugaqartuniit ilikkarneqarsimalerput, puigortunngortullu eqqarsaatigalugit qalipaatilimmik ikkussisimapput sunngaartumik, taannalu eqqaasittuarnerisigut ilikkarneqarsimalluni asuli aniffissaanngineriniq.

10.

Utoqqaat Illuanni namminerimi malittarisassat

Ombudsmandimiit ilisimatinneqarneq suli pinngitsumi aqutsisuusut ilisimasimangilaat aatsaat kommunalbestyrelsimiit akuerineqaaqaartartussaagaluarneriniq, soorlu assersuutigalugu aqutsisuusup nammineerluni aamma allamik malitassamik nivinngaasimasoq pulaartarneq pillugu, allallu malitassatut suliarineqarsimasut. Kisiannili fg. afdelingslederip ilisimasaqarnerulernermini suliasat tamakku eqqumaffiginerullugit suliniuteqarusulluni.

Ombudsmandip uparuartugaa allagarsiussami soorlu allasimasoq najugaqartut nerinerisa nalaanni pulaartoqaqqusaannginneranik oqariartuutigisaanut tunngatillugu ilisimatitsisutigivaa ukiumut pulaartartut assigiinngitsutigut isersinnaasartut soorlu assersuutigalugu ukiup qanoq ilinerani, upernaakkut aasakkullu pulaartoqarnerusarsimapput, ukiukkut pulaartoqanngingajattarlutik, ukiornerani pulaartartut maqaasinarsisarsimallutik.

Najugaqartut imigassamik atuisarnerannut tunngatillugu Qaasuitsup Kommuniunermi ajornartorsiutigineqarsimangikkaluartoq nutaatut ajornartorsiutigisalersimallugu ilisimatitsivoq, tassa Ilulissaniit Utoqqaat Illuanniit malitassat tungaasigut maleruutilersimallutik, soorunami allagarsiinikkut allasimasoqarpoq Utoqqaat Illuanni imigassartortoqarsinnaanngitsoq, uani eqqarsaatigineqarluni isersimaartarfinni gangimi najugaqartunut akornutaasumik atuinissaq inerteqqutaalluni, taamaattorli ineeqqani najukkaminni allanut akornutaanngitsumik atuisinnaallutik, taannalu maannakkut ajornartorsiutaanngitsoq ilisimatitsisugineqarluni.

Init arlaat pujortarfusinnaasutut pitsorlunnerusuniit oqaatigineqarpoq, kisiannili piginnaarnerusut anillutik pujortariartartut, maannakkullu taamatut atugaqarlutik.

Qaanaami Utoqqaat Illuanni fg. afdelingslederiusup qilanaaraa Avannaata Kommuniani assigiinnerusumik utoqqaat illuini malitassaqaqarnissaq taamatullu aamma inatsisit atuuttut pillugit sulisut akisussaannerusullu pikkorissarneqartarnissaat pillugu.”